

《五母子經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 14, No. 555a

No. 555

五母子經

吳月氏國居士支謙譯

昔者有阿羅漢。在山中奉行道業。有一小兒。年始七歲。大好道法。辭母出家。求作沙彌。隨大沙門。於山中學道給師所須。誦經行道時無有懈。至年八歲。得慧眼。能通視無極。耳能徹聽。天上天下。所為善惡。皆聞知之。身能飛行所在至到。能分一身及人自化無所不作。自知宿命。所從來生及人民。蚊行蠕動之類。所經歷善惡之道。皆悉知之。先世宿命。為五母子時。便坐自笑。其師問何等而笑。沙彌答言。無所笑也。師曰。是山中亦無歌唱伎樂。汝笑嗤我耳。沙彌答言。不敢笑師。但自笑耳。我一身為五母作子。母皆為我。晝夜啼哭感傷愁毒。不能自止。常念子憂思。未常忽忘。我自念一身而憂毒五家。以是笑耳。不敢笑師。我與第一母作子時。竝隣亦復生子。與我同日而生。其子出入行步。我母見之。便悲念我子在者。亦當出入行步如是。愁毒淚下如雨。悲言念子。我為第二母作子時。我短命又早死。我母見人乳兒。便念乳我悲哀涕泣。言念我子。我為第三母作子時。我年十歲。復少死。母臨食悲哭泣淚。言念我子在者。亦當與我共食。捨我死去。使我獨食。哽咽言念我。復為第四母作子時。我薄命先死。我等輩娶婦。我母見之。即念我子在者。亦當為子娶婦言我何負蒼天而殺我子。復為第五母作子時。我始年七歲。好道辭家。捨母隨師。入山求道。得羅漢道。我母日日啼哭言。我生一子。隨師學道。不知所在。飢飽寒溫。不知生死。不復相見。愁毒言念我子是五母適共一會各各言亡我子。相對啼哭。不能相止。是我一身一魄。展轉而與五母腹中作子。固疑惑人而使眾悲哭發狂。但共念我一身耳。各欲自殺。是故笑耳。發念世間。凡人不知死。當有所至。生皆共言死耳。凡人何能知死。當有生作善。自得其福。作惡得其殃。不有所遺人。在世間皆為惡業無所畏難。死後當入泰山地獄中。苦痛極哉。後悔無所復及我厭世間。勤苦故辭父母。入山精進求道。今我目見畜生餓鬼地獄中。代之恐怖。今被蒙佛恩。得聞經法。今我日夜憐傷五母。不能自脫。反憂我所求願。皆以得念世間人。展轉相生。亦復相笑。無有休息。身皆歸土魂當所作。隨其善惡。皆不能自拔。斷其恩愛。能離貪欲。可得度脫。我以不復與生死會。我恨身以斷如人不種當泥洹道最樂。長復與勤苦。為師說之。已便飛去